

內閣
官旁
志求



內閣志

清 常熟席吳鏊寶箴撰

鏊退居里中日無事追憶服官綸扉時所見所知者爲內閣志竊附于不賢者識小之列于國典紀載不爲臚陳俟後之君子參而考焉

內閣在五門內太和門外自五門循牆而東升太和門東廊之南頭下乃抵焉後戶斜直文華殿出東華門可三百步許自後戶直北可六七百步至景運門即乾清門之右掖門也于禁廷最爲密邇外曹百司無故不得輒入違者重辟論今堂戶之上懸金書扁具載此令世祖時建云此言內閣衙門京城九左崇文南右宣武北之東安定北之西德勝東之北東直東之南朝陽西之北西直西之南阜城皇城七門周十八里零南永定左左安右右安東廣渠西廣寧東隅東便西隅西便內五門太和東華景運隆宗乾清

其設官則有大學士學士侍讀學士侍讀中書舍人典籍明獨有大學士及兩房舍人餘官本朝設大學士與學士並滿漢分設學士參用蒙古員大學士則否侍讀學士侍讀向無漢員雍正初始設漢侍讀後又設掌副本漢舍人自大學士下合百餘員官職滋繁于前矣此言內閣官制大學士所居曰堂舍人所居曰房典籍所居曰廳其外又有滿洲堂蒙古堂侍讀學士至舍人咸居之而侍讀之分領各房者多與舍人接席治事焉此言舍人所居之房而先言大學士之堂尙尊也

大學士堂上南嚮坐。虛其中。敬至尊也。滿左漢右。學士東西嚮坐。亦滿左漢右。侍讀學士升堂。大學士爲起或不侍讀以下。侍立問對。與學士則皆對揖。此言大學士學士坐嚮之儀。

侍讀學士異于學士者。不得堂上坐耳。于大學士不爲屬。侍讀以下爲屬。然其稱謂如師生。不似外曹之

堂司也。外曹惟禮部與內閣爲近。此言侍讀學士。

明重首揆。次輔幾不敢與齒。本朝閣臣少所差別。在國典則有押班一人。屬之滿大學士。餘次序之先後。皆請旨定之。其私相稱謂。則先入者爲前輩。後入者爲後輩。學士以下。于其儕輩皆然。有後入而官少尊者。其執禮如故。如舍人爲侍讀。然唯漢人能習之。

明大學士秩五品。有遷尙書職者。其列銜主尙書。而以大學士爲兼官。尙書尊故也。加孤卿則序銜又先之。其後閣臣班位。竟列六部上。然本秩如故。雍正中始定大學士秩一品。雖不加公孤。尊莫與抗。而尙書爲其兼官。蓋其來已久。不謂之眞宰相得乎。此言大學士品秩之尊。

大學士缺。吏部列名以請。惟六尙書一都御史而已。有由內大臣及外總督等官拜者。乃出特旨。不在開列內。又有遙授外臣而不入閣者。亦繫正員。非若漢以左丞相。唐以平章事。寵武臣者比。其外又有額

外大學士。協辦大學士。額外得缺。輒卽眞。協辦有終不得者。皆一時用人之權宜。非常例也。此言大學士缺有開

列有特旨。有遙拜。其外又有額外缺。協辦缺。

凡大學士初命入閣。是日內閣翰林官。並先集五門內。及門。兩典籍引而入。升東廊塔。悉從升至閣。若滿大學士先坐滿洲堂。受滿侍讀以下謁。漢大學士則不抵閣之內門。學士迎于塔上。堂揖就坐。侍讀學士升堂揖。其餘以次升。揖皆三。于侍讀學士離坐答。餘皆立答半揖。或舉手答。翰詹開坊以上官升堂。揖亦離坐答。送不出堂戶。編檢以下庭下揖。亦答半揖。故事。大學士由翰林起家者。先于翰林院受任。院有堂。唯大學士坐此。是以相沿有中堂之稱。然近來多逕赴閣中矣。此大學士入閣儀注。

大學士于軍國事無所不統。詳在會典。茲不載。其實每日所治事。則閱本也。本有二。曰部本。在京部院進者。曰通

本。外文武大臣及奉使員。具本送通政使轉上者。票擬皆舍人按故事爲之。大學士晨入。晝可否。然少所更定。閱已。次閱絲綸簿。又次閱章奏文書。日亭午。蔑不出矣。大學士事無不統。其每日所治。惟以閱本爲事。

大學士佐天子理機務。得不時召見。其治事未嘗不在閣。雍正中以邊事設軍需房于隆宗門外。後又謂房。時則有馬公張公蔣公三大學士參領軍機。馬公之後。鄂公。常居中候伺。日一再見。遂不至閣。惟駕在西苑。蔣公間日至。其後又以起草覆奏寄字外省與夫閣務有特建者。皆自內主之。舍人在閣書寫。出入

多稽滯。乃設直房于軍機房之旁。擇滿侍讀以下數人。漢侍讀一人。舍人二人入直。專治內事。其入直者亦不復至閣。至乾隆初。邊事息。軍機房不廢。由是大學士以下。有內外廷之判矣。大學士之治事也。待召見。則在軍機房。此大學士以下。所以有內外廷之判也。

大學士之在內者。始由內廷供奉。其後以與軍機益有名。然亦未嘗□至所謂軍機房者。往往晨朝坐乾

清門外板屋中。少頃或徑入。百僚趨而稟事。懼弗逮。既召見。有事出輒入。其居止或在南書房。或在內食

于大官。日兩餐。退以申爲期。人咸知爲天子所尤倚任也。其在內廷供奉者。或在南書房。或在內直房。惟西苑則在軍機房。

凡辦本之次。舍人閱已。先書草簽。侍讀詳看。大學士審定之。舍人以所草登于籍。謂之草簽簿。隨書真簽。

簽以奏本紙爲之。其式縱可七寸許。橫視其字多寡。滿漢文具一幅。上滿文左行。漢文右行。中填日月

某部某督撫某事。紙背列舍人書簽者姓名。乃送滿票簽房。夾置于本而加檢視之。而加整齊之。凡今

日所辦。明日上滿舍人。捧至宮門。送紅本上檢閱遞進。紅批處在乾清門內。不設專官。謂之紅本上云。御覽畢。復交紅本上。依

簽朱書于本尾。滿舍人候本發。接出至閣。漢學士乃朱書于本面。字極大。蓋本內墨跡。書之無礙。交漢

票簽房。登于籍。謂之絲綸簿。其簽封貯之。然後以本分類發料。料抄發部。計一本之進。經數十手。而其

事甫畢。其緝密詳慎如此。辦本次第。

凡票擬吏兵部遷除本。其簽式上空姓名。下書補授某官姓名。皆御筆朱書填之。此用人詳審之道。而臣

下之得被選擢者亦榮矣。吏兵部遷除本。姓名皆御筆。

凡用京闈考官。及勾決刑部囚。其本皆密封至閣。開勾決本。尤防漏洩。候勾到後。于內補繕票簽。惟與其

事二三人知之。考官及決囚。其本皆密封。

凡本內兩擬簽上曰雙簽。御覽用其一。則中破其一。以閣簽爲未允。御筆改。或令大學士改。曰改簽。待改不輒定。本不以期下曰留中本。積四五件或十數件。天子爲之御門。集槐棘平議以決焉。雙簽改簽留中本

留中本積歲終時。則不及御門。並於百司封篆前一日下其所改簽。大學士受旨而出。在乾清門視草。舍人挾紙筆以從。俟進御更定輒書之。或大學士口授書以疾速不悞爲工。是日發本。竟往往畫漏盡矣。

留中本歲終下。

凡不進本日有三。聖祖忌日、孔子誕日、佛誕日。其外輟朝日亦止不進。不進本日。

明閣務之壞。由于內監之批紅。輔臣票擬後拱手待決。今之紅本上。與漢學士所掌。卽其職也。學士大臣。知自愛重。紅本上無專員。取他官五品以下充之。其委寄既非閣寺比。而所進票擬又無不至上前者。

是以悚息無敢玩法焉。紅本上一職。卽明之批紅。

學士侍讀學士侍讀典籍之設。皆視翰林院。特其職掌異耳。滿學士御門讀本。侍讀學士總閱翻譯。侍讀領諸舍人事。典籍掌史籍及奉行文書。有印篆。至閣中章奏。如名號諡法之上請。皆其所擬也。內閣諸臣各有

職掌。

凡進御之本。必滿漢文兼。通本獨有漢文。故翻譯房則主譯文。滿本房則主繕寫。又有所改本也。譯文未善則改之。計每日進御累數十件。矻矻辦理。常懼不及。謹國制故也。凡職掌不詳列以上三條。並牽聯言之。

舍人之侍直。有日直。有夜直。有西苑之直。有扈從之直。凡日直者入夜直者始退。夜直亦然。日直可四五

人。若員多則更三番。少僅二番。夜直例用俸淺者十人。更直。駕在宮則二人直。赴西苑則一人直。西苑

之直。以二人併直。五晝夜。接直者至。乃退。扈從之直。若巡行祭陵。舍人一人從。其車馬之費。合而資給

焉。以上特言漢員。若滿員又不同。夜直則票簽房本房並有。日直不甚更番。凡各房可數十許人。苑直更番。併侍讀往。扈從職掌亦多于漢員。

閣中自票擬所降旨外。王言之不以時下者。曰諭。唐虞之咨嗟。命官周漢之誥詔。具焉。今通謂之上諭。詔

唯大事用之。誥為錫命五品以上之辭。其五品以下曰敕。雍正中開館編集。七年前上諭時已積十

餘表。綸綍之富。古無與比。王言之不以時下者。有諭。有詔。有誥。有敕。

批答與票擬事同一例。今特用于內外臣之摺奏。凡摺奏直達于上。不由閣。批示悉出御筆。交部議者或

否。其交部之摺。則自閣轉授焉。批答出自御筆。交部之摺。則自閣出。

凡摺奏之交部院議者。慮其不以時覆。則庶政有稽。雍正初設稽察房。立期會以督責之。凡期會之寬迫。

視其職閒冗。與移牒遠近。令月具籍送閣候稽核。閣臣劾其玩者。于月之上旬以聞焉。部議不以時覆。內閣因設稽察房。

房。

閣員既日直禁廷。凡陪視坐班。及護日月食諸典禮。悉不與。亦所以慎重王言也。閣員不與典禮事。

舍人例得與制科試。自雍正癸丑後。連三四科殿試多登一甲者。至一甲中有二人。科名為最盛矣。舍人得與

制科
試

機務之繁。無如雍正中。世宗念閣臣勞。于八年封篆日。有白金之賜。張公二萬兩。馬蔣二公各萬兩。後又錫以世爵。恩至渥矣。又山海關進羨金三千兩。特命一賜閣員。于是自學士以下。靡不分霑。真卹下之曠典也。閣員遊額外之恩。

大學士記附

鑿在官七年。凡大學士皆我所事也。念古之于為官者。往往有記。大學士名在國史。可弗記也。茲記之者。特不忘所事之義。於其登陟所由。及封爵卒諡詳焉。有協理而未即真者。不列入。

滿大學士七人

馬公齊

康熙中由某官拜大學士。伯爵。以事罷。既而復位。世宗登極。為四輔臣之一。雍正中閣臣奏事。列名上。世宗御筆抹其名。遂不敢任事。常家居。惟大典禮一入朝。乾隆初。以老乞休。得優旨。予告。卒諡文穆。

馬公爾賽

雍正初。由領侍衛內大臣。拜大學士。公爵。後為大將軍。以失律誅。

孫公柱

雍正初。由尚書拜大學士。卒于位。諡□□。

尹公泰。

雍正中由左都御史拜額外大學士。後即真。乾隆初卒于位。諡□□。

鄂公爾泰。

雍正中由雲貴總督拜大學士。常兼兵部尚書事。以總督時征烏蒙功。賜伯爵。後以病解。今上登極。召復于位。為總理輔臣。乾隆中命兼翰林院學士事。卒于位。諡文端。遵世宗遺詔。配享廟廷。

邁公柱。

雍正末由湖廣總督拜大學士。乾隆初卒于位。諡□□。

查公郎阿。

雍正中由大將軍吏部尚書遙拜大學士。罷大將軍。又為川陝總督。乾隆初始入閣。見居位。

漢大學士六人

朱公軾。

雍正初由尚書拜大學士。奉使京畿。管田。後丁內艱。命居京師。不治事。以管田事不效。罷職。又命視浙之海塘。今上登極。在道。召還。為副總理輔臣。復任閣事。乾隆初卒于位。諡文正。

張公廷玉。

雍正初由尚書拜大學士。兼戶部尚書。及翰林掌院學士。後常兼吏部。今上登極。為總理輔臣。兩朝再以勞錫世爵。併為伯爵。見居位。

蔣公廷錫。

雍正中由尚書拜大學士兼領戶部
尚書事以勞錫世爵卒于位謚文獻

陳公元龍

雍正中由尚書拜額外大學士後
卽真以老乞休乾隆初卒謚文簡

嵇公會筠

雍正中由吏部尚書河道總督
遷拜大學士後移督浙江乾隆初卒于任謚□□

徐公本

雍正中由尚書拜協辦大學士已而卽真今上登極爲
副總理輔臣乾隆初以勞錫世爵後以病解見居家





冬官旁求

辛紹業著

本館據豫章叢書
本影印初編各叢
書僅有此本

昔王氏昭明作冬官補義錢氏黻李氏文炤繼之錢作冬官補亡李作周禮集傳皆旁搜傳記以補冬官之闕王氏補十八官錢氏補二十一官李氏補三十五官錢氏所補十一官爲李氏所未載而於司空不立大小之名李氏於大司空小司空豕人權人都司空家司空不言所據亦未爲詳盡先生此書凡補五十三官援經据傳各疏所出較三家實爲精審原刻甚精阮齋所藏余段鈔度篋有年歷覽藏書家罕覩其貳蓋流傳希矣爰校而重刻之光緒十有九年四月新建後學陶福履



冬官旁求卷上

萬載 辛紹業 馥千 著

謹案漢書藝文志云周官經六篇師古曰卽今之周官禮也亡其冬官呂考工記充之陸德明敘錄曰河閒獻王開獻書之路時有李氏上周官五篇失事官一篇乃購千金不得取考工記呂補之是則五官全而冬官本缺非因錯亂糅莒而致然也自臨川俞壽翁剏爲雜出五官之說取五職之近于事典者改入冬官而各官復有移易以爲周官

之全在是嗣後永嘉王氏臨川吳氏清源邱氏椒
邱何氏與夫方正學舒國裳陳鳳梧諸人紛紛割
補而五官之文乃遂大亂夫冬官雖亡而自有其
不亡者不當于五官求之也經傳所載官名非五
官所有者甚多案其職事往往于事典有合而司
空之職散見諸書者雖非周禮之文當亦不甚相
異卽其所掌以考諸職如肉貫弗因備錄其文參
之註解附目管案而事官之屬十可八九得矣至
于官名非五官所有而不可指爲冬官者附論於